

不疑人欺而不詐人善而不悅人懼而不怖內存其真外和其人享無窮之壽而上賓于天此道德理身也

疏理國則絕矜高棄華薄以無為不言為教

義曰文子問老君曰理國之本如何老君

曰本在理身也五三未聞身理而國亂身亂而

國理者夫理國者靜以修身全以養生則

下不擾下不擾則人不怨為理之本在於

足用足用之本在於勿奪勿奪之本在於

省事省事之本在於節用節用之本在於

去就去就之本在於無為夫天致其高地

致其厚日月照星辰期陰陽和非有為也

正其道而物自然化也此乃絕矜高棄華

薄無為不言之旨也下經首章曰大丈夫

處其厚不處其薄居其實不居其華是也

上經第二章曰是以聖人處無為之事行

不言之教是也教者訓教於人可以垂訓

於永久也論語云子以四教詩序云教以

化之是也易云聖人以神道設教言教者

以教於人而世之眾教皆以有執有為為

本今老君此教以無為不言為化故為眾教所尊理道所貴也

道德真經廣聖義卷之三

五三

正一天師清微弟子 洪百堅 製作

道教學術資訊網站

道德真經廣聖義卷之四

五四

唐廣成先生杜元處述

釋御疏序下

疏理身則少私寡欲以虛心實腹為務

義曰少私寡欲虛心實腹者上經第十九

章云見素抱朴少私寡欲上經第三章云

虛其心實其腹也及上所引經文並解在

正經中向下當辨務者愆事之名也君子

有常務論語云君子務本是也

疏此其要旨可得而言也

義曰要謂機要旨謂指歸此經乃理身之

指歸理國之機要可以言述固得而言也

疏及平窮理盡性閉緣息想

義曰易云窮理盡性以至於命窮者窮極

萬物深妙之理究盡生靈所索之性物理

既窮生性又盡以至於一也又解云窮理

者極其玄理盡性者究其真性玄理真性

者幽洞深可以神鑒不可以言詮也閉緣

息想者隨境生欲謂之緣因心繫念謂之

想於此門中分為四列一曰意隨善境而

生善欲謂之善緣二曰意隨惡境而生惡欲謂之惡緣三曰心繫善念而生善想四曰心繫惡念而生惡想雖同因境所起分爲善惡夫初修道者既閉惡緣又息惡想以降其心心澄氣定想念真正稍入道分善緣善想亦復忘之窮達妙理了盡真性想緣俱忘乃可得道故云窮理盡性閉緣息想也

疏處實行權

義曰處者居也實者真諦玄微所謂妙本之道也大乘之趣也權者因事制宜隨俗立教謂中乘之道以誘開悟亦猶理國理身之首先實權教後入大道實教者上經第三十五章云執大象天下往又云吾將鎮之以無名之樸又云自古及今其名不去是也權教者上經第三十六章云將欲歛之必固張之將欲廢之必固興之是也

疏坐忘遺照

義曰坐忘者墮肢體黜聰明遺形去智以至乎大通謂之坐忘至道深微不可以言

宣止可以心照既用照得悟其照亦忘故曰坐忘遺照此皆大乘之道也
疏損之又損玄之又玄殆不可得而言傳者也

義曰爲道之人遺處達妙損之又損漸入玄微玄之又玄即階真趣下經第四十八章云損之又損之以至於無爲上經首章云玄之又玄衆妙之門是也此乃得之於玄會契之於無爲非文字能詮非言句能述老君曰道者可獻則臣獻於君道者可傳則父傳於子斯固非可言傳也損者毀滅之謂也玄者深微之謂也

疏其教圓

義曰行有五教分爲五列一曰挫銳解紛和光同塵初教也二曰見素抱朴虛心實腹漸教也三曰外其身而身存後其身而身先平教也四曰損之又損之以至於無爲無爲而無不爲則無不理滿教也五曰澹然常存用之不勤天地有終大道無變圓教也合此爲教五者俱備萬行總包故

曰其教圓圓者圓通一切道無不在之謂也

疏其文約

義曰約限也省也不出二篇包羅萬法不曰約乎

疏其旨暢

義曰暢通也吾言甚易知其易行言有宗事有君不曰暢乎

疏其言通

義曰通近也以身親身以家觀家不出戶知天下不窺牖見天道不曰通乎

疏故遊其廊廡者自以爲昇堂觀與

義曰廊廡步廊也廡堂下也與內也西南隅謂之奧古世儒之士習道之人始觀此經自謂窮理盡性以極玄微耳

疏及其研精覃思然後知其於秋毫之端萬分未得其一也

義曰沉研鑽極考情運思探道之真極道之源箋註詮疏以求聖人之旨所得之理逾少聖人之意逾深郭象曰秋毫之端細

矣又未得其萬分之一也秋毫者免秋所生之毛也端者末也

疏經曰有物混成先天地生吾不知其名字之曰道強為之名曰大

義曰此引上經第二十五章以證妙道之名

名也有物者無中之有恍惚之物也混成者天地未分謂之混沌天包於地地混無

端天地浮載於水中積聚於氣內謂曰混元以其道氣化生分布形兆乃為天地而

道氣在天地之前天地生道氣之後故云有物混成先天地生也莊子曰大道者未

有天地自古以固存吾者老君自稱也混成之狀恍惚之象先天地混然獨立名

號未彰言語路絕所以老君強為立字字之曰道強為立名名之曰大其道廣博包

裹天地貫穿萬物故名大道也

疏故知大道者虛極妙本之強名語其通生也

義曰夫道有情有信無為無形可傳而不可授可得而不可見在大極之表而不為

高在六極之下而不為深故謂為虛極之妙本也以其生天生地神鬼神帝故言其

通生也道者通也虛者至無也極者至高也妙者至玄也本者化源也

疏莊子曰太初有無無有無名者未立強名也故經曰無名天地之始

義曰莊子姓莊名周宋國蒙邑人也嘗趨文王齊宣王梁惠王時師長桑公子受其

微言隱於抱犢山服大丹昇天署位為太極華編郎入侍帝晨稽康云又師涓子居

世時為漆園吏著書三十三篇皆言大道放曠無為之理大唐天寶四載四月封為

南華真人所著書為南華真經此則引第十二天地篇也太初者未見氣也有無無

有無名者無有故無名號也此名未立強名之道以前大道無名強而名之謂之道

強名之初天地之始也

疏強名通生曰道故經曰有名萬物之母義曰道通也通以一氣生化萬物以生物

故故謂萬物之母母茂養之稱也經云者

指此經首章之詞也引此首章以證大道之名爾

疏莊子又曰物得以生謂之德義曰莊子天地篇之文也虛無不能生物

明物得虛無微妙之氣而能自生是自得也任其自得故謂之德也

疏德得也言天地萬變旁通品物皆資妙本而以生成得生為德

義曰德者人之所得是也夫三才萬物資道妙用各得生成無不遂性故謂之德旁

通者周遍之謂也品物者衆物也資者取也用也妙本者道也

疏故經曰道生之德畜之義曰此下經第十四章文也引此正文重

明道德生畜之義用合莊子物得以生之理此明有以無為本無以有為用道德相

須為上下二經之目也

疏則知道者德之體德者道之用也

義曰真實凝然之謂體應變隨機之謂用杳冥之道變化生成不見其迹故謂之體

也言妙體也莊子曰其來無迹其去無涯無門無旁四達之皇皇是也因此妙體展轉生死生化之物任乎自然有生可見而不為主故謂之用此妙用也莊子曰昭昭生於冥冥有倫生於無形是也

疏而經分上下也

義曰冥冥之道上也昭昭之德下也大聖說經本無道上德下之別而詮釋之家強為箋解言道非德無以顯德非道無以明道無為無形故居化物之先德有用有為故在生化之後道居先故處於上德居後故處於下由是分上下二經亦猶天清而居上地濁而處下爾

疏先明道而德次之

義曰妙無生妙有由精以至麤次者亞也先後之謂也

疏然體用之名可散也

義曰精麤先後可兩言之體精而為本樸也用麤而為末器也故言散爾
疏體用之實不可散也

義曰同契乎無故不可散散者分別之謂也雖因用而有分別在生化終始倚伏相須詣理源實故不可散言萬形之殊舍妙道也

疏故經曰同出而異名同謂之玄

義曰妙體妙用生於妙無是同出也由精而麤是異名也混而為一是同謂之玄也疏語其出則分而為二皆其同則混而為一義曰分而為二者體與用也混而為一者歸妙本也莊子曰蘊蘊乎其終則復始也

疏故曰可散而不可散也

義曰體用雖異是何散也相資而彰不可散也

疏則上經曰是謂玄德又曰孔德之容又曰德者同於德又曰常德不離

義曰道經之中明此德者則明道資於德也

疏下經曰失道而後德又曰反者道之動又曰道生一又曰大道甚夷

義曰德經之中明此道者則明德宗於道

也

疏是其體用互陳遮明精要

義曰道資於德德宗於道是互陳也互者交也差也隙者布也互觀其理皆達精微斯所謂不可散也

疏不必定名於上下也

義曰外分道德之殊而經有互陳之義不可以道經為上德經為下今異之者強而異之非玄理精要之旨也

疏經者徑也

義曰習道之蹊路登真之徑門左丘明曰經者不刊之書也精要之道由徑而通

疏又常也言通徑常行之道也

義曰因經通道斯道常明故曰常也因凡悟仙自仙極果垂文永劫普度無窮太平長生皆由茲教故云通徑常行之道也

疏每惟聖祖垂訓貽厥孫謀

義曰每數也惟思也訓教也貽與也厥其也謀圖也數思者虔奉之義也虔奉聖祖老君垂教之旨與及聖孫詩文王之什文

王有聲篇云貽厥孫謀以燕翼于萬世王能廣文王之聲大其成功而傳國於子孫言玄元聖祖垂此無為清靜之訓以及我唐子孫與此帝國傳弘道化也

疏聽理之餘伏勤講讀

義曰天子垂拱南面以聽天下之政理亦政也聽政之暇講讀二經亦猶乙夜觀書之義爾臨文曰讀演義曰講既宣其文復講其義遂為註疏焉伏勤者專釋不輟之義也餘暇也

疏今復一二詮疏

義曰詮評也講暢真義詳考玄微一二教陳蓋得其理國修身無為清靜之旨也疏其要妙者書不盡言

義曰要精要也妙玄妙也精要玄妙非書可傳理絕於言議之間故云書不盡言矣易曰書不盡言言不盡意蓋無言之言窮理之理庶乎神洞幽蹟了悟忘言此故非文字可詮評也

疏粗舉大綱以裨助學者爾

義曰粗不精也羸也略也裨益也助佐也綱結繩也網之上下有絃繩以惣之故張羅網者整其綱猶衣之舉領耳淮南子曰舉其綱萬目張斯乃總眾目之稱也舉其大綱眾目可見矣言此疏可以佐益講學

之人開廣其聞見耳竊惟天章煥赫揭日月以齊光聖藻精微與乾坤而並運深入自然之室宏開眾妙之門竦崑崙於詞峰游滄瀛於義海滯邪者望風而懸解忘返者悟教而知歸真祖闡至妙於前睿孫讚古微於後二聖垂作萬古無倫而猶申禪助之言示謙冲之訓益明聖旨矣

疏凡六卷

義曰凡者凡例之言汎舉之謂也春秋序曰發凡以言例也上下二經疏各三卷亦粗明一生三之意六者陰數也三者陽數也三以象乾合乾為坤離之則為陽合之則為陰言此疏包天地乾坤之要窮陰陽變化之微故成六卷爾又凡者生上起下之名也

道德真經廣聖義卷之四